



JUDICIAL SYSTEM MONITORING PROGRAMME  
PROGRAMA MONITORIZASAUN BA SISTEMA JUDISIÁRIU

**Komunikadu Imprensa**  
**06 Agostu 2021**

**Vítima menoridade barak husi kazu abandonadu mak seidauk asesu ba justisa formál**

Iha 27 Jullu 2021, JSMP liuhusi nia Unidade Apoia ba Vítima (VSS Unit) ba iha Postu Admistrativu Turiskai, Munisípiu Manufahi hodi akompaña no lori labarik menoridade hamutuk na'in (4) haat husi família rua ne'ebé sira nia aman abandona durante tinan 3 ona, hodi ba trata sira nia sertidaun RDTL iha Diresaun Jerál Serbisu Rejistu no Notariadu, Ministériu Justisa iha Munisípiu Manufahi, antes JSMP akompaña menór sira ne'e ba rejista sira nia kazu (abandona) iha Ministériu Públiku Suai tanba inan sira la hatene dalan atu lori kazu ne'e ba tribunál.

“Labarik sira iha direitu hetan protesaun husi sira nia inan-aman tanba ne'e mezmu inan-aman sira fahe malu ona maibé parte rua nafatin iha dever atu tau-matan ba oan sira. Kazu abandona barak mak tribunál foti ona desizaun maibé JSMP fiar katak kazu hanesan ne'e barak mós la keixa tanba comunidade barak la hatene dalan oinsa atu lori sira nia kazu abandona ne'e ba iha tribunál. Tanba ne'e, JSMP liuhusi unidade Apoia ba Vítima prontu atu fó akompañamentu ba vítima violénsia bazeia ba jéneru inklui kazu abandona sira, hahú husi inísiu to'o kazu ne'e rejista iha Ministériu Públiku atu nune'e labarik sira nafatin goza sira nia direitu intermus alimentasaun, hela fatin no rejime vizita,” dehan Sra. Ana Paula Marçal, Diretora Ezekutiva JSMP.

Iha Konstituisaun RDTL artigu 18 nú. 1 kona-ba protesaun ba labarik-oan sira haktuir katak labarik sira iha direitu ba protesaun espesiál husi família, comunidade no mós Estadu, liliu hasoru hahalok hotu hanesan la tau-matan, diskriminasaun, violénsia, operasaun, abuzu seksuál no explorasaun. Reforsa mós ho Konvensaun Direitu Labarik sira nia iha artigu 3 nú. 2 katak Estadu partisipante sira sei buka atu garante katak fó duni protesaun no kuidadu sira ba labarik sira tanba ida ne'e, persiza ba sira nia moris-di'ak no konsidera mós direitu no dever inan-aman, tutor ka ema seluk ne'ebé tuir lei iha responsabilidade ba labarik nian no sei fóti mós medida lejizlativu no administrativu apropriadu hotu-hotu ba objetivu ida.

Iha JSMP nia dada-lia ho vítima sira nia família, haktuir katak sira kontente tebes ho prezensa JSMP nian iha sira nia leet tanba durante ne'e kazu la'en abandona nia feen no oan barak tebes maibé comunidade sira la hatene dalan atu lori ba iha tribunál no konsidera kazu abandona hanesan kazu bain-bain ne'ebé la presiza ba iha tribunál.

Vítima sira nia família mós hatutan tan katak nia sei hatutan informasaun ba nia maluk feto sira ne'ebé sira nia la'en abandona hela kona-ba JSMP nia apoiu ne'e no sei kontaktu ba JSMP bainhira sira presiza apoia. Sira mós rekomenda ba JSMP atu di'ak liu atu fahe

Rua Beco Lakateu, Aldeia Manu fuik,  
Suku Colmera, Administrativu Vera Cruz  
Dili Timor Leste  
PoBox: 275

Telefone: 3323883 | 77040735

[www.jsmp.tl](http://www.jsmp.tl)

[info@jsmp.tl](mailto:info@jsmp.tl)

Facebook: [www.facebook.com/timorleste.jsmp](https://www.facebook.com/timorleste.jsmp)

informasaun direta kona-ba asesu ba tribunál ka justisa ba comunidade Postu Turiskai tanba durante ne'e laiha instituisaun ruma mak ba fahe informasaun kona-ba asuntu justisa.

“Alende comunidade Turiskai, bazeia ba ami nia observasaun durante hala’o treinamentu iha fatin-fatin, comunidade barak mak apresenta sira nia problema no preokupasaun hanesan kona-ba la hatene dalan atu lori sira nia kazu sira ba iha tribunál sira no antes ne’e JSMP hala’o atividade fahe informasaun kona-ba asesu ba justisa iha baze maibé agora dadaun atividade refere paradu tanba menus orsamentu. Maski nune’e ami nafatin rejista preokupasaun sira ne’e no sei responde bainhira iha ona rekursu finanseiru,”tenik diretora JSMP.

Informasaun kona-ba kazu abandonadu iha Postu Administrativu Turiskai ne’e, JSMP hetan (simu kontaktu) husi funsionáriu Ministériu Justisa bainhira funsionáriu ne’e bá halo serbisu iha Postu Turiskai, Munisípiu Manufahi. Tanba ne’e, JSMP hakarak hato’o agradesimentu ba Ministériu Justisa ba kolaborasaun ne’e no hein katak kolaborasaun ne’e bele kontinua iha futuru espesífiku ba problema sira ne’ebé fetu no labarik sira hasoru.

Atu hetan informasaun kompletu, favór kontaktu:

Ana Paula Marçal

Diretora Ezekutiva JSMP

Diresaun e-mail: [ana@jsmp.tl](mailto:ana@jsmp.tl)

Telefone: (+670) 33238883 | 77040735

Website: <https://jsmp.tl>

[info@jsmp.tl](mailto:info@jsmp.tl)